

საქართველოს პროფესიონალ ბუღალტერთა და აუდიტორთა ფედერაციის სარევიზიო კომისიის დებულება

1. ზოგადი დებულებანი

- 1.1 ბაფის საქმიანობის კონტროლის მიზნით გამგეობის უფლებამოსილების ვადით იქმნება სარევიზიო კომისია.
- 1.2 კომისია ამოწმებს ბაფის საერთო კრებისა და გამგეობის გადაწყვეტილებების ბაფის წესდებასთან შესაბამისობასა და მათი შესრულების მდგომარეობას, შემოსავლებისა და ხარჯების სამართლიანობას, მათი შესაბამისობის ხარისხს დაგეგმილ ბიუჯეტთან.
- 1.3 კომისია საერთო კრებას წელიწადში ერთხელ წარუდგენს გაწეული მუშაობის ანგარიშს.
 - განახორციელოს ფედერაციის ბიზნესისა და ფინანსური საქმიანობის შემოწმება;
 - მოამზადოს და წარუდგინოს შემოწმების შედეგები გამგეობის სხდომებსა და ფედერაციის საერთო კრებებს;
 - განახორციელოს კონტროლი, რათა უზრუნველყოს ფედერაციის ადმინისტრაციული ორგანოების მიერ ფედერაციის წესდებისა და სხვა ნორმატიული დოკუმენტების დაცვა

2. კომისიის სტრუქტურა, კომპეტენცია და კომისიის წევრთა უფლებამოსილებანი

- 2.1. კომისიის შემადგენლობა განისაზღვრება 3 წევრით.
- 2.2. კომისიის შემადგენლობას ირჩევს ბაფის საერთო კრება.
- 2.3. კომისიის წევრი შეიძლება იყოს მხოლოდ ბაფის წევრი.
- 2.4. კომისიის წევრები ირჩევენ კომისიის თავმჯდომარეს. კომისიის თავმჯდომარეს ამტკიცებს ბაფის წევრთა საერთო კრება.
- 2.5. კომისია თავისი კომპეტენციის ფარგლებში:
 - ა) ადგენს შემოწმების პერიოდსა და ვადებს.
 - ბ) ამოწმებს ბაფის წევრთა საერთო კრებისა და გამგეობის გადაწყვეტილებების შესრულებას.
 - გ) ამოწმებს ბაფის ადმინისტრაციული ორგანოების მუშაობის ეფექტურობას, ბაფის წესდებასა და სხვა ნორმატიული დოკუმენტებთან მისი საქმიანობის შესაბამისობას.
 - დ) ახორციელებს ბაფის ფინანსური საქმიანობის შემოწმებას, მატერიალური რესურსების გამოყენების მიზნობრიობასა და ეფექტიანობას.
- 2.6. კომისიის წევრს უფლება აქვს:
 - ა) აირჩიოს კომისიის თავმჯდომარე ან/და არჩეულ იქნეს კომისიის თავმჯდომარედ.
 - ბ) თანაბარ საწყისებზე მონაწილეობდეს კომისიის მუშაობაში, განსახილველ საკითხებზე გამოთქვას შენიშვნები, მოსაზრებები და წინადადებები.
- 2.7. კომისიის წევრი ვალდებულია:

- ა) მონაწილეობა მიიღოს კომისიის მუშაობაში.
- ბ) არ გაახმაუროს კონფიდენციალური ინფორმაცია.
- გ) შეასრულოს კომისიის თავმჯდომარის მიერ მასზე დაკისრებული მოვალეობები.

3. რევიზიის პროცესი და შედეგები

- 3.1. გეგმური რევიზია ტარდება წელიწადში ერთხელ, როგორც წესი, საერთო კრების ჩატარების წინა პერიოდში. კომისია უფლებამოსილია გეგმური შემოწმების შუალედში განახორციელოს ცალკეული საკითხის თემატური შესწავლა ბაფის ხელმძღვანელობასთან შეთანხმებით.
- 3.2. კომისიის სამუშაო გეგმით გათვალისწინებული სამუშაოები შეიძლება გადანაწილდეს კომისიის წევრებს შორის.
- 3.3. კომისია სამუშაო გეგმას და გრაფიკს წარუდგენს ბაფის აღმასრულებელ დირექტორს.
- 3.4. აღმასრულებელი დირექტორმა კომისიას უნდა შეუქმნას სათანადო სამუშაო პირობები, გააცნოს საჭირო დოკუმენტაცია და მისცეს ახსნა-განმარტება მოთხოვნისამებრ.
- 3.5. შემოწმების პერიოდი განისაზღვრება შესამოწმებელი საკითხების სირთულით, მაგრამ არ უნდა აღემატებოდეს ერთ თვეს.
- 3.6. შემოწმების შედეგებთან დაკავშირებით კომისია ადგენს დასკვნას, რასაც თან დაურთავს საჭირო და აუცილებელ მასალებს. აღნიშნულს ეცნობა და ხელს აწერს აღმასრულებელი დირექტორი.
- 3.7. სარევიზიო კომისია თავის დასკვნას, შემოწმების შედეგების შესახებ შესაბამის რეკომენდაციებთან ერთად წარადგენს ბაფის წევრთა საერთო კრებაზე.

4. კომისიის სხდომები

- 4.1. კომისიის სხდომების პერიოდულობას განსაზღვრავს კომისია. კომისიის სხდომის ჩატარების თარიღსა და დროს განსაზღვრავს კომისიის თავმჯდომარე.
- 4.2. კომისიის წევრები ვალდებული არიან დაესწრონ კომისიის სხდომას და მონაწილეობა მიიღონ მის მუშაობაში.
- 4.3. კომისიის სხდომა უფლებამოსილია, თუ მას ესწრება კომისიის 2 წევრი.
- 4.4. კომისიის სხდომაზე გადაწყვეტილება მიიღება ღია კენჭისყრით, სხდომაზე დამსწრე კომისიის წევრთა ხმის უმრავლესობით. ხმების თანაბრად გაყოფისას გამამყვეტია კომისიის თავმჯდომარის ხმა.
- 4.5. კომისიის სხდომაზე:
 - ა) განიხილება დაგეგმილი შემოსავლები და ხარჯები, წლიური ფინანსური ანგარიშგება, ბაფის წევრთაგან მიღებული საჩივრები, განცხადებები და სხვა ინფორმაცია, ბაფის თანამდებობის პირთა ახსნა-განმარტებები და სხვა საკითხები.
 - ბ) მიიღება კომისიის რეკომენდაციები, დასკვნები და წინადადებები.
- 4.6. კომისიის რეკომენდაციები, დასკვნები და წინადადებები, როგორც წესი წარედგინება ბაფის წევრთა საერთო კრებას. აუცილებლობის შემთხვევაში, კომისიის გადაწყვეტილებები შეიძლება წარედგენოს ბაფის თავმჯდომარეს გამგეობის სხდომაზე განსახილველად.
- 4.7. კომისიის მოთხოვნის შემთხვევაში, ბაფის აღმასრულებელი დირექტორი ვალდებულია დაესწროს კომისიის სხდომებს და პასუხი გასცეს სხდომაზე დასმულ შეკითხვებს